

ԱՇԽԱՐՀԱԳՐԱԿԱՆ ԴԵՏԵՐՄԻՆԻՋՄԸ ՀԱՅ ՊԱՏՄԱԳՐՈՒԹՅԱՆ ՄԵՋ

Ա. Մ. ՈՍԿԱՆՅԱՆ

Մինչև մարքսիզմի երևան գալը գիտության մեջ գոյություն ունեին զանազան թյուր կարծիքներ հասարակության զարգացման պրոցեսում աշխարհագրական միջավայրի գերի ու նշանակության մասին: Հասարակության զարգացման հարցերով զբաղվողները կա՛մ բոլորովին անտեսում էին աշխարհագրական միջավայրի դերը և կա՛մ խիստ գերազնահատում էին այն, համարելով հասարակական զարգացման հիմնական շարժիչ ուժը:

Աշխարհագրական միջավայրը, հատկապես երկրի կլիմայական պայմանները, հասարակության զարգացման վճռական գործոն էին համարում դեռևս անտիկ աշխարհի մտածողներ Հիպոկրատը, Պլատոնը, Արիստոտելը: Վերջինս, օրինակ, գտնում էր, որ հելլենները, ապրելով բարեխառն կլիմայի պայմաններում, օժտված են և՛ արիության, որն իբր հատուկ է միայն հյուսիսի ցուրտ երկրների բնակիչներին, և՛ խելքով ու սրամտությամբ, որոնք, բոլորովին, հատուկ են տաք երկրների մարդկանց: Հենց այդ պատճառով էլ, Արիստոտելի կարծիքով, հելլենները հաճույքով զբաղվում են քաղաքական կյանքով և ի վիճակի են իշխելու ուրիշ ժողովուրդների վրա: Այսպիսի դատողություններով ստրկատիրական հասարակարգի զաղավարականները ձգտում էին հիմնավորել մի ժողովրդի գերիշխանությունը այլ ժողովուրդների վրա:

Հասարակության զարգացման գործում աշխարհագրական գործոնների վճռական նշանակության մասին ուսմունքը, այսպես կոչված աշխարհագրական դետերմինիզմը, ստեղծվում ու լայն տարածում է ստանում աշխարհագրական մեծ հայտնագործությունների դարաշրջանից հետո, երբ Եվրոպայում արագ թափով սկսեցին զարգանալ կապիտալիստական հարաբերությունները և նախկինում շտեմնված շահերով աճեց բնական հարստությունների օգտագործումը զարգացող բուրժուական էկոնոմիկայի կարիքների համար: Միջնադարյան սխոլաստիկայի ու աստվածաբանության դեմ ուղղված նոր, համեմատաբար առաջադիմական սոցիոլոգիական ուսմունքները, այդ թվում առաջին հերթին աշխարհագրական դետերմինիզմը, փորձում էին հասարակության զարգացումը բացատրել՝ ելնելով օբյեկտիվ, բնական և ո՛չ թե աստվածային դրոպալատականներից: Այս էր աշխարհագրական դետերմինիզմի առաջադիմական էությունը՝ այդ ուսմունքի զարգացման սկզբնական էտապում:

Այս շրջանի ամենախոշոր դեմքն է ֆրանսիացի գիտնական Շարլ Լուի Մոնտեսքյուն, որի «Օրենքների ոգու մասին» գրքով դրվում են նոր ժամանակների աշխարհագրական դետերմինիզմի հիմքերը:

Մոնտեսքյուի ուսմունքի էությունը հետևյալն է. երկրի կլիմայական պայմանները որոշում են մարդկանց բնավորությունը, բարքերն ու հակումները,

որոնցից կախված են տվյալ ժողովրդի հասարակական կառուցվածքը, նրա կյանքի բնույթը, օրենքները, քաղաքական կառուցվածքը և նույնիսկ աղատության զարգացման աստիճանը: Այսպիսով, աշխարհագրական միջավայրի էլեմենտներից մեկը՝ կլիման, Մոնտեսքյոյի մոտ երևան է գալիս որպես հասարակության զարգացման վճռական գործոն:

Մոնտեսքյոյի տեսությունը կլիմայի ամենագոր ազդեցության մասին (իր գրքում նա մի տեղ ուղղակի գրում է. «Կլիմայի իշխանությունը ամեն մի իշխանությունից ուժեղ է»¹), չնայած իր հարաբերական պրոգրեսիվությանը, հենց սկզբից իր մեջ կրում էր մի շարք ռեակցիոն հետևությունների հնարավորությունը: Այդ ուսմունքը հետևողականորեն կիրառողը պետք է ընդուներ, որ տաք երկրների ժողովուրդները, կլիմայական առանձնահատկությունների հետևանքով, բնականորեն եղել են ու կմնան ճնշված ու ենթակա վիճակում, որովհետև տաք կլիմային իբր թե համապատասխանում է միմիայն մտավոր, կուլտուրական ու տնտեսական հետամնացությունը²: Մոնտեսքյոյի ուսմունքից այսպիսի ռեակցիոն հետևություններ անելու հնարավորությունը մատնանշել էին դեռևս XVIII դարի ֆրանսիական մատերիալիստները (մասնավորապես Հելվեցիուսը): Սակայն ի պատիվ Մոնտեսքյոյի պետք է նշել, որ նա ոչ միայն այդ կարգի ռեակցիոն հետևություններ չէր անում իր ուսմունքից, այլ, ընդհակառակը, պնդում էր, որ եթե որևէ երկրում օրենքները չեն համապատասխանում կլիմային, հետևապես՝ նաև մարդկանց բարքերին ու բնավորությանը, ապա անհրաժեշտ է վրիժվել դրանք և համապատասխան դարձնել կլիմային ու մարդկանց բնավորությանը: Դժվար չէ նկատել այս կարգի պնդումների պրոգրեսիվ, հակաֆեոդալական էությունը:

XIX դարի կեսերին աշխարհագրական դետերմինիզմի հիմնավորմամբ ու պաշտպանությամբ հանդես եկավ անգլիացի սոցիոլոգ Հենրի Թոմաս Բոքլը, որը ձգտում էր այդ «տեսության» հիման վրա արդարացնել դասակարգային անհավասարությունն ու իմպերիալիստական պետությունների գաղութային քաղաքականությունը: Բոքլը գտնում էր, որ նյութական հարստությունների ինչպես արտադրությունը, այնպես էլ բաշխումը լիակատար կախման մեջ են աշխարհագրական պայմաններից, որոնց ազդեցության ուժը իբր անհաղթահարելի է և որոնցով որոշվում է նաև հասարակական ողջ զարգացման հիմքը հանդիսացող իդեական զարգացումը: Բոքլի կարծիքով, «բարձր և ստորին դասակարգերի միջև եղած փոխհարաբերությունը հիմնականում կախված է բնության առանձնահատկություններից»³, այսինքն՝ ըստ էության եղել է ու կմնա անփոփոխ, իսկ գաղութային ժողովուրդների ճնշված ու հետամնաց վիճակը հետևվանք է յուր բնության անհաղթահարելի օրենքների ներգործոն ազդեցության⁴: Այսպիսով, Բոքլը իր ուսմունքով ըստ էության հանդես էր գալիս որպես բուրժուական հարաբերությունների և գաղութատիրության ջատագով:

¹ Шарль Монтескье, О духе законов, СПб., 1900, էջ 306:

² Տարբեր ժողովուրդների ու ցեղերի «անհավասարության» և «անհամարժեքության» պատճառները աշխարհագրական պայմանների մեջ փնտրող աեռակետները, ինչպես հետագայում կտեսնենք, լայն զարգացում ու տարածում ստացան եվրոպայի կապիտալիստական երկրների գաղութային լայն էքսպանսիայի ժամանակաշրջանում տարածված աշխարհագրական դետերմինիզմի մեջ:

³ Генри Томас Бокль, История цивилизации в Англии, СПб., 1895, էջ 27:

⁴ Տե՛ս նույն տեղում, էջ 30—31:

XIX դարի ընթացքում աշխարհագրական դետերմինիզմը լայն տարածում ստացավ հատկապես Գերմանիայում: Նրա ականավոր ներկայացուցիչներից էին Կարլ Ռիտտերը և Ֆրիդրիխ Ռատցելը: Նրանցից առաջինը ձգտում էր ապացուցել աշխարհագրական միջավայրի և առաջին հերթին՝ տվյալ երկրի աշխարհագրական գիրքի որոշիչ նշանակությունը ժողովուրդների պատմական բախտի համար: Ինչ վերաբերում է Ռատցելին, ապա նա իր մի շարք աշխատություններում «հիմնավորեց» ոչ միայն բուրժուական հակադիտական «ոսասական տեսությունը», այլև զարգացրեց աշխարհագրական դետերմինիզմի «տեսությունը», պնդելով, որ աշխարհագրական միջավայրի վճռական ազդեցությունից է կախված ամեն մի ժողովրդի ինչպես տնտեսական զարգացման աստիճանը, այնպես էլ քաղաքական կառուցվածքի բնույթն ու կուլտուրական մակարդակը: Ռատցելը պնդում է, որ ժողովրդի ճակատագիրը սլայմանավորում են հողն ու երկինքը, բուսական ու կենդանական աշխարհները: Նա գտնում է, որ «տվյալ երկրի դիրքը որոշակի կիսագնդում, որոշակի աշխարհամասում, թերակղզում, արշիպելագում, ծովերի, լճերի, դետերի, անապատների մոտիկությունը, — այս ամենը որոշում են պատմության ընթացքը»¹:

Իր նախորդներից մի խոշոր քայլ առաջ գնալով աշխարհագրական դետերմինիզմից արվող ռեակցիոն հետևությունների մեջ, Ռատցելը, որպես պատմական ասպարեզ իջած գերմանական իմպերիալիզմի կարկառուն դադափարախոսը, դրում էր. «Եթե մի որևէ ժողովուրդ իր պատմական զարգացման ընթացքում չի ունեցել ընդարձակ հողալիս տարածություններ, ապա նրա գերագույն կոչումը առաջին հերթին արտահայտվում է աճի բանում, որնա լավացնում է իր աշխարհագրական դիրքը. նա վերացնում է ներքին արգելքները, լավացնում է արտաքին սահմանները, ընդարձակում է իր հողալիս տարածությունը՝ հարևան հողերը նվաճելու միջոցով, ձեռք է բերում հեռավոր գաղութներ»²: Ռատցելի կարծիքով, «ձգտումը դեպի ընդարձակ ծավալումը, որը երկրի սահմանները լայնացնում է մինչև հնարավոր սահմանները», հանդիսանում է «լարձրագույն կուլտուրայի հատկանիշը»³:

Աշխարհագրական դետերմինիզմից բխող այս էքսպանսիոնիստական նպատակասլացությունը լիովին համապատասխանում էր գերմանական ռազմատենչ բուրժուազիայի իմպերիալիստական ձգտումներին: Ահա թե ինչու Ռատցելը հանդիսացավ գերմանական ֆաշիստների իդեոլոգիական զենքերից մեկի՝ այսպես կոչված գեոպոլիտիկայի նախակարապետներից մեկը:

Աշխարհագրական դետերմինիզմը իր կողմնակիցներն ուներ նաև ռուսական բուրժուական պատմաբանների ու սոցիոլոգների մեջ: Այսպես, հայտնի ռուս գիտնական Կարլ Էռնստ Բերը գտնում էր, որ «ժողովուրդների ճակատագիրը, կարծես թե անխուսափելիորեն, կանխորոշվում է նրանց զբաղեցրած վայրի բնությամբ»⁴ և որ «համաշխարհային պատմության ընթացքը, իհարկե, ավելի շատ որոշվում է արտաքին ֆիզիկական պայմաններով»⁵:

¹ Ф. Ратцель, Человечество как жизненное явление на земле, 1901, էջ 102:

² Ф. Ратцель, Земля и жизнь, т. 2, էջ 102:

³ Ф. Ратцель, Человечество как жизненное явление на земле, էջ 86:

⁴ Сб. «Карманная книжка для любителей землеведения, изданная от Российского географического общества», СПб., 1848, էջ 210:

⁵ Նույն աեղում, էջ 230—231:

Հայտնի ռուս պատմաբան Ս. Մ. Սոլովյովի կարծիքով «ժողովրդի կյանքի վրա հատուկ ազդեցություն են դործում երեք պայմաններ. այն երկրի բնությունը, ուր նա ապրում է, այն ցեղի բնույթը, որին նա պատկանում է, արտաքին անցքերի ընթացքը, այն ազդեցությունները, որ դալիս են նրան շրջապատող ժողովուրդներից»¹: Ընդգծելով աշխարհագրական միջավայրի վճռական նշանակությունը, մի այլ տեղ նա գրում էր. «Գեպքերի ընթացքը մշտապես ենթակա է բնության պայմաններին»²: Մի այլ ռուս պատմաբան, Ա. Պ. Շչապովը գրում էր, որ «մարդիկ բնական ձևերի կենդանի մարմնավորումներն են»³, իսկ Վ. Ս. Կլյուչևսկին պնդում էր, որ հին Ռուսաստանի պատմությունը հիմնականում ընթացել է «ըստ դետերմինիզմի ծրագրի»⁴:

Հետագայում մենք կտեսնենք, որ աշխարհագրական դետերմինիզմի հայ կողմնակիցների շատ մտքերը կրկնում են ռուս այս դիտարկումների կարծիքները:

XIX դարում աշխարհագրական դետերմինիզմի խոշորագույն ներկայացուցիչներից էր ռուս դիտարկող Լև Կլյուչ Մեչնիկովը: Իր «Քաղաքակրթությունը և պատմական մեծ դետերմինիզմը» հիմնական աշխատության մեջ նա ձգտում է ապացուցել, որ աշխարհագրական միջավայրը հանդիսանում է սլատմական առաջադիմության այն վճռական գործոնը, որով պայմանավորված է հասարակական կառուցվածքի բնույթը: Հասարակության զարգացման գործում Մեչնիկովը հիմնական գերը վերագրում է դետերմինիզմին: «Մեր տեսակետից, — գրում է նա, — քաղաքակրթության առաջացման ու զարգացման հիմնական պատճառ հանդիսանում են դետերմինիզմը: Գետը, ամեն մի երկրում, հանդիսանում է ֆիզիկա-աշխարհագրական պայմանների — և՛ կլիմայի, և՛ հողի, և՛ մակերևույթի կազմության, և՛ տվյալ մարդի երկրաբանական կառուցվածքի — ամբողջության կենդանի սինթեզի մի տեսակ արտահայտությունը»⁵:

Հարկ է նշել, որ մեր հիշատակած ռուս դիտարկումներից ոչ մեկը իր ուսմունքից որևէ ռասիստական կամ էքսպանսիոնիստական եզրակացություն չէր անում: Ընդհակառակը, աշխարհագրական դետերմինիզմի ամենացատուն ռուս ներկայացուցիչը՝ Մեչնիկովը բացարձակորեն ու շատ խիստ է արտահայտվում արևմտաեվրոպական որոշ դիտարկումների հակադիտական ռասայական «տեսությունների» դեմ, որոնք առանձին ժողովուրդների տնտեսական ու կուլտուրական հետամնացությունը բացատրում էին նրանց անփութիւն ռասայական հատկանիշներով, որոնք իրր թե աշխարհագրական միջավայրի ազդեցության անխուսափելի հետևանք են:

* * *

Աշխարհագրական դետերմինիզմով ժամանակին հրապուրվել են նաև հայ պատմաբաններից ոմանք: Եվ դա պատահական երևույթ չէ, եթե հիշենք, որ

¹ С. Соловьев, Начало Русской земли, էջ 761:

² С. Соловьев, История России, книга 1, էջ 13:

³ А. П. Шапов, Сочинения, т. II, 1906, էջ 158:

⁴ В. О. Ключевский, Курс русской истории, ч. I, Петроград, 1918, էջ 70:

⁵ Лев Мечников, Цивилизация и великие исторические реки, М., 1924, էջ 159:

⁶ Նույնը վերաբերում է նաև աշխարհագրական դետերմինիզմի հայ ներկայացուցիչներին, որոնցից առավել աչքի ընկնողների տեսակետների վերլուծմանը մենք անդրադառնալու ենք ստորև:

նախքան մարքսիստական պատմագրության երևան գալը հալ, ինչպես և ուսական ու արևմտաեվրոպական պատմագրության մեջ անբաժանելիորեն իշխում էին վուլգար մատերիալիստական կամ իդեալիստական սոցիոլոգիական ուսմունքները, իսկ վերջինների թվում՝ նաև աշխարհագրական դետերմինիզմը:

Հայ պատմաբաններից առաջինը Ա. Մ. Գարագաշյանն էր, որի մոտ մենք տեսնում ենք աշխարհագրական դետերմինիզմի որոշակի արտահայտություն: Իր «Քննական պատմություն հայոց» գրքում նա մեր պատմագրության մեջ առաջին անգամ փորձ արեց մեկ միասնական պատմագիտական սկզբունքով քննարկման ենթարկել հայ ժողովրդի անցյալ պատմությունը, ձգտելով բացահայտել նրա պատմական զարգացման շարժիչ ուժերը, որոնելով դրանք ոչ թե լոկ առաջնորդների ու թագավորների արարքների մեջ (ինչպես ալդ անում էր հայ ավանդական, կղերա-ֆեոդալական պատմագրությունը, որի կարկառուն ներկայացուցիչը Չամչյանն էր), այլ փնտրելով վերջիններիս զրգապատճառները երկրի ներքին ու արտաքին պայմաններում: Անշուշտ, սա շատ արժեքավոր առաջընթաց քայլ էր հայ նախորդ պատմագրության համեմատությամբ: Սակայն կանգնած լինելով իդեալիստական դիրքերում, Գարագաշյանը հավասարապես կարևոր էր համարում և՛ երկրի աշխարհագրական դիրքը, և՛ մեր ժողովրդի սակավաթիվ լինելը, և՛ հայերի ու հարևան ժողովուրդների բնավորության դժբեր, և՛ դրացի երկրների հակամարտությունները, — բոլորովին անտեսելով հասարակական զարգացման միակ վճռական գործոնը՝ նյութական բարիքների արտադրության եղանակն ու նրա նշանակությունը ժողովրդի պատմական զարգացման համար:

Գարագաշյանը իր տեսակետը այն մասին, թե ինչ սկզբունքներից պետք է ելնել ժողովրդի պատմությունը ուսումնասիրելիս, Գարագաշյանը գրում է. «Որովհետև ազգ կամ ժողովուրդ մը, թէև ինքնիշխան, ցորչափ կենդանի և գործող է՝ չկարէ լինել այն աստիճան զատուցեալ և առանձին, մինչև բոլորովին դուրս մնալ որեւիցէ արտաքին ազդեցութենէ, այլ միշտ ուրիշ գոնէ զօրաւոր ազդերէ, ինչպես նաև իւր աշխարհագրական որպիսութենէն աւելի կամ նուազ ազդում ընդունելու յարմար է՝ հարկ է պատմութիւնը, թէև մասնաւոր և ազգային՝ յառաջ տանել նկատելով ժամանակին ընդհանուր և մասնաւոր տիրող պատմութիւնը. չէ պարտ մոռանալ նաև երկրին և դրացի երկիրներուն աշխարհագրական փոփոխումն, որ զհետ գայ ներքին և արտաքին քաղաքական փոփոխմանց»¹:

Ելնելով վերոհիշյալ դիրքերից, նա հետևյալ կերպ է բացատրում հայկական պետականության անկումը Հռոմի և Սասանյան Իրանի գերիշխանության շրջանում: «Հայք, թէև ուրոյն թագաւորութիւն՝ շեղան կարող, երկրին դրից և ուրիշ ներքին և արտաքին պարագաներու պատճառաւ, ունենալ անկախ գոյութիւն: Հայաստան...ի վախճանի անկաւ իսպառ ընդ իշխանութեամբ երկու հին ոսոխ տէրութեանց: ...Պատճառք անկման Հայոց են պէսպէս, ներքին և արտաքին: Ներքին պատճառք են, որպէս ասացաւ՝ դիրք երկրին, որ առնէր զնա ասպարէզ անդու պատերազմացի մէջ երկու հակառակորդ տէրութեանց (Բիդղէր), սակաւութիւնն... և աւատային (fe dal) գրութիւնն: Իսկ արտաքին պատճառք

¹ Ա. Մ. Գարագաշյան, Քննական պատմութիւն հայոց, Ա մասն, Առաջաբան հեղինակի, Թիֆլիս, 1895, էջ 1:

են՝ երկու դրացի մեծ տէրութեանց միոյն մոլեռանդութիւնն և միւսոյն յոռի քաղաքականութիւնն»¹:

Այս քաղվածքի մեջ ամենից հետաքրքրականը այն է, որ իր ասածի ճշմարտացիութիւնը հավաստելու համար Գարաղաշյանը վկայակոչում է իր ժամանակվա աշխարհագրական դետերմինիզմի ամենահայտնի ու ճանաչված ներկայացուցիչներից մեկին՝ գերմանացի գիտնական Կարլ Ռիտտերին, որը, ինչպես վերևում ասել ենք, ձգտում էր ապացուցել աշխարհագրական միջավայրի, և, առաջին հերթին, ամեն մի երկրի աշխարհագրական դիրքի, վճռական նշանակութիւնը նրանում բնակվող ժողովրդի պատմական բախտի համար: Որ Գարաղաշյանը ծանոթ էր XIX դարի երկրորդ կեսում խիստ տարածված աշխարհագրական դետերմինիզմին, ինչպես և 1817—1859 թթ. ընթացքում լույս տեսած Ռիտտերի աշխատութիւններին ու բաժանում էր նրանց հեղինակի վերոհիշյալ տեսակետը, աներկբաւորեն վկայում է վերևում բերված քաղվածքը և հատկապես Ռիտտերի վկայակոչումը Գարաղաշյանի կողմից: Մեզ հետաքրքրող հարցի վերաբերյալ երկու հեղինակների տեսակետների միջև միակ հիմնական տարբերութիւնն այն է, որ Գարաղաշյանի մոտ աշխարհագրական ֆակտորի որոշիչ նշանակութիւնը այնպես վճռականորեն չի շեշտված, ինչպես Ռիտտերի մոտ:

Հաջորդ խոշոր հայ պատմաբանը, որի մոտ ցայտուն կերպով արտահայտված է աշխարհագրական դետերմինիզմը, Ստ. Պալասանյանն է: Թեպետ և նա զուրկ է պատմութեան շարադրման քննական մեթոդից, այնուամենայնիվ աշխատում է գտնել հայ ժողովրդի պատմական զարգացման հիմնական շարժառիթները, որոնք նրա մոտ վերջին հաշվով հանգում են աշխարհագրական ֆակտորներին:

Հայ ժողովրդի հին ու միջնադարյան ողջ պատմութիւնը իր բոլոր նախորդների նման ֆեոդալիզմի պատմութիւնն համարելով և ձգտելով բացատրել ֆեոդալական կարգերի առաջացման պատճառները Հայաստանում, Պալասանյանը գրում է. «...Կառավարութեան մեկ կամ մյուս ձևը կախված է երկրի դիրքից, ժողովրդական կյանքի պայմաններից և շրջակա ազգերի բնավորութիւնից: Պատմութիւնից տեսնում ենք, որ քարքրոտ (sic!) ու ավազոտ տեղերում և ծովային ափերի մոտ բնակող ժողովրդները, իրենց չոր ու ցամաք երկրի պատճառով, շուտով ստիպվում են դաշտային երկրները ասպատակել կողոպուտ անելու դիտավորութեամբ: Այսպիսի ժողովրդների մեջ բնականապես դերագույն իշխանութիւնը հենց սկզբից այն գերդաստանի ձեռքն է անցնում, որից դուրս են գալիս քաջասիրտ և հաջողակ առաջնորդներ. կազմվում է մի ժառանգական հարստութիւն և միապետական իշխանութիւնը անզգայի կերպով հաստատութիւն է առնում: Ուրիշ բան է պատահում հովիտական ու երկրագործական խաղաղ ժողովրդների մեջ: Այստեղ առանձին գերդաստաններ միանում և ցեղական ընկերութիւններ են կազմում առանձին ցեղապետների պաշտպանութեան տակ, որոնց պարտքն է հովվել իրենց ցեղը և պաշտպանել նորա սեփականութիւնն ու աշխատանքի պտուղը անիրավութեան դեմ: Այստեղ արյունակից դերդաստաններ կամաց կամաց ցեղական ընկերութիւններ կազմելով՝ գերդաստանի հոր իրավունքներն էլ անցնում են ցեղապետին, և

¹ Ա. Մ. Գարաղաշյան. Քննական պատմութիւն Հայոց, Բ մասն, գլ. ԺԲ, էջ 267: «Աւատային դրութիւն» ասելով Գարաղաշյանը նկատի ունի երկրի ֆեոդալական մասնաւորութիւնը:

այսպիսով կազմվում է կալվածական կամ տանուտիրական կառավարությունը, որ Հայոց էլ՝ իրրե հովվական ու երկրագործական ժողովրդի, սեփական էր սկզբնական ժամանակներում»¹:

Մի այլ տեղ, խոսելով հայկական նախարարությունների առաջացման պատճառների մասին, Պալասանյանը գրում է. «Նախարարությունը այնքան հին է որքան և Հայոց ազգությունը...: Բխելով այն ցեղական իշխանություններից՝ որ Հայաստանի աշխարհագրական դիրքի շնորհիվ անհիշատակ ժամանակներից կազմվել էին երկրի ղանաղան կոչմամբ, նախարարությունները հետզհետե զարգացան ու զորացան, և Հայոց հին թագավորների բոլոր ջանքերը դուր եղան նվաճելու և կենտրոնական իշխանությանը հպատակեցնելու նոցա»²:

Եթե փորձենք վերլուծել ֆեոդալիզմի առաջացման խիստ բարդ ու կարևոր պրոբլեմի այս մեկնարկությունը, որ տալիս է Պալասանյանը, կատարյալ հետևյալ պարզունակ սխեման. որը, ինչպես արդեն տեսել ենք, շատ բնորոշ է աշխարհագրական դետերմինիզմի կոլմնակիցների համար.

1) քարքարոտ (հետևապես՝ նաև լեռնային) ու ավազոտ վայրերում ապրող ժողովուրդները «իրենց չոր ու ցամաք երկրի պատճառով» ստիպված են ասպատակել ու կողոպտել դաշտային երկրները.

2) դրա հետևանքով (այսինքն՝ վերջին հաշվով երկրի քարքարոտ, չոր ու ցամաք, ավազոտ կամ լեռնային լինելու հետևանքով) այդ ժողովուրդների մեջ գերազույն իշխանությունը հենց սկզբից «բնականապես» անցնում է «քաջասիրտ և հաջողակ» առաջնորդ ունեցող գերդաստանի ձեռքը:

3) այսպես «անզգալի կերպով», որպես երկրի բնական պայմանների հետևանք, առաջանում են «ժառանգական հարստությունը» (դինաստիան) և միապետական իշխանությունը.

4) հովվական ու երկրագործական ժողովուրդների մոտ, որոնք ապրում են անհամեմատ բերրի երկրներում, մարդկանց աշխատանքի պտուղն ու սեփականությունը «անիրավության դեմ» (այսինքն՝ «չոր ու ցամաք» երկրներից եկող կողոպտիչներից) պաշտպանելու համար, առանձին գերդաստանները միանալով կազմում են «ցեղական ընկերություններ».

5) միացող գերդաստանների հայրերի իրավունքները կամաց-կամաց անցնում են ստեղծված «ցեղական ընկերության» ցեղապետին.

6) այսպիսով, վերջին հաշվով դարձյալ երկրի աշխարհագրական պայմանների հետևանքով, առաջանում է «կալվածական կամ տանուտիրական կառավարությունը», այսինքն՝ ֆեոդալական հասարակարգը, որը իրրե թե ամենասկզբնական ժամանակներից հատուկ էր նաև հայերին՝ որպես հովվական ու երկրագործական ժողովրդի:

Մեր մեջ բերած քաղվածքները ցույց են տալիս նաև, որ երբ Պալասանյանն ասում է, թե երկրի կառավարության այս կամ այն ձևը բացի աշխարհագրական դիրքից («աշխարհագրական դիրք» ասելով Պալասանյանը հասկանում է երկրի մակերևույթի կազմությունն ու աշխարհագրական տեղադրությունը) կախված է նաև «ժողովրդական կյանքի պայմաններից և շրջակա

¹ Ու. Պալասանյան, Պատմություն հայոց սկզբից մինչև մեր օրերը, Թիֆլիս, 1890, էջ 50—56 (ընդգծումները մերն են—Ա. Ռ.):

² Նույն տեղում, էջ 129 (ընդգծումը մերն է—Ա. Ռ.):

ազգերի բնավորությունից», ապա նա դրանց տակ հասկանում է ոչ այլ բան, քան եթե ժողովրդի զբաղմունքները՝ կողոպուտ անելը, հողագործ կամ խաշնարած լինելը և այլն, որոնք, ըստ Պալասանյանի, դարձյալ հետեանք են աշխարհագրական որոշակի պայմաններին:

Իսկ որո՞նք էին, ըստ Պալասանյանի, միջնադարյան Հայաստանի ֆեոդալական մասնատվածության, կենտրոնացած պետական կազմավորումների անկախությունից և կարճատև գոյության պատճառները: Ահա թե ինչպես է բացատրում նա այդ բարդ ու կարեւոր երևույթները իր գրքի «Նախադիտելիք» բաժնում, որը ընդհանուր ներածականի բնույթ ունի և ըստ էության հանդիսանում է Պալասանյանի ընդհանուր-պատմական կոնցեպցիայի համառոտ շարադրանքը:

«Եթե ուշի ուշով հետազոտենք Հայոց երկրի ձևակերպությունը, — գրում է նա, — կտեսնենք, որ զորավոր ազդեցություն է ունեցել ազգի պատմական լախտի վրա: Ամբողջ երկիրը կտրտված է մեծ ու փոքր լեռներով՝ որոնց հետևում են ձորեր ու հովիտներ, և բազմաթիվ գետերի ու վտակների հոսանքներով, որոնք իրեն մի մի բնական պատվար՝ բնակիչները միմյանցից անջատում և հազորակցությունը դժվարացնում էին: Այս հանդամանքը նպաստեց ցեղական կյանքի զարգացմանը Հայոց մեջ, և հենց սկզբից երկրի պանազան կողմերում կազմվեցան բազմաթիվ մեծ ու փոքր իշխանություններ, որոնք առ հասարակ ձգտում էին թագավորությունից անկախ լինել: Արարատյան թագավորները որքան և աշխատեցան, չկարողացան կոտորելու իրենցից աշխարհի իշխանությունները: Ստիպված լինելով մեկ կողմից ներքին թշնամիների դեմ մաքառելու և մյուս կողմից Հայաստանի շուրջը հետզհետե կազմվող զինվորական պետությունների դեմ, որպիսիք էին ասորա-բաբելական և մարապարսկական տերությունները, — Հայոց թագավորները չհաջողեցան մի կենտրոնական հզոր միապետություն կազմել, որ յուր իշխանությունը տարածեր յովանդակ երկրի վրա: Ընդհակառակն, ներքին երկպառակությունները, որ Հայոց տերության թերի կազմակերպության հետեանք էին, ընդհատեցին պետության զարգացումը և նա թույլ ու անպաշտպան մնաց արտաքին թշնամիների առաջ: Այսպիսով Հայաստանը որս դարձավ նախ Հռոմայեցոց ու Պարթևաց և ապա Բյուզանդիայի կաշարների և Սասանյան թագավորների ձեռքը, հետո դատապարտվեցավ իրեն Արարացոց լուծը և ոտնակախ լինել թուրքերից ու Մոնղոլներից, մինչև ու վերջապես բաժանվեցավ Օսմանցոց ու Պարսից և վերջերս նաև Ռուսաց մեջ»¹:

Այս մեջբերումից պարզ երևում է Պալասանյանի եզրահանգումների հետևյալ շարքը: Լեռներով, ձորերով, հովիտներով ու գետերի հոսանքներով կտրտված մակերևույթի կազմության շնորհիվ, Հայաստանում զարգացել է «ցեղական կյանքը», որը հիմք է հանդիսացել անջատողական, կենտրոնախույս հովերով տարված բազմաթիվ «իշխանությունների» (իմա՝ նախարարությունների — Ա. Ո.) առաջացման: Պետության այս «թերի կազմակերպության» հետեանքով (որը, ինչպես տեսանք, վերջին հաշվով դարձյալ աշխարհագրական պայմանների հետեանք էր) Հայաստանը նվաճվել է հարևան զորեղ պետությունների կողմից...

¹ Ստ. Պալասանյան, Պատմություն հայոց սկզբից մինչև մեր օրերը, էջ 11—12 (ընդգծումները մերն են—Ա. Ո.):

Ի մի բերելով ու ամփոփելով Պալատականի վերևում հիշատակված բոլոր մտքերը, անխուսափելիորեն կհանգենք այն եզրակացությանը, որ նրա կարծիքով ժողովուրդների, մասնավորապես հայ ժողովրդի պատմական զարգացման բոլոր կարևորագույն անցքերը՝ աշխատանքի առաջին՝ մեծ բաժանումը («ասպատակող» որսորդների, հողագործների ու խաշնարածների առանձնացումը), ժառանգական միապետական իշխանության և «ցեղական ընկերությունների» հիման վրա գոյացող նախարարությունների առաջացումը, երկրի ֆեոդալական մանրատվածությունը, ֆեոդալների անջատողական ձրգտումները, կենտրոնացած իշխանության թուլությունն ու կարճատև կյանքը, — այս ամենը հետևանք են գլխավորապես և համարյա բացառապես երկրի աշխարհագրական դիրքի ու պայմանների:

Աշխարհագրական դետերմինիզմը հայ պատմաբաններից ամենից ավելի որոշակիորեն արտահայտված է Լեոյի մոտ:

Իր «Հայոց պատմության» I հատորում մանրամասնորեն նկարագրելով «Հայկական լեռնակողմը» ֆիզիկա-աշխարհագրական պայմանները, Լեոն հանդում է հետևյալ բնորոշ եզրակացությանը, որը, ըստ էության, նրա պատմա-փիլիսոփայական կոնցեպցիայի մի կարևոր բաղադրիչ մասն է.

«Համեմատական աշխարհագրությունը ուսումնասիրում է այն ազդեցությունները, որոնց տակ մի երկիր, մի ազգաբնակչություն կազմակերպվում է իբրև հասարակական-պատմական երևույթ: Այդ բնական ազդեցությունները երբեք տեսակ են. աստղարաշխական (կլիմա և այլն), ֆիզիկական (երկրի կազմակերպություն՝ և այլն) և բուսական ու կենդանական աշխարհի ազդեցություն: Մենք, որ մանրամասն ծանոթացանք այս բոլոր ազդեցությունների հետ, այժմ կարող ենք եզրակացություններ հանել, թե ինչ տեսակ քաղաքական և կուլտուրական կյանք կարող էր զարգանալ Հայաստանի լեռնակողմում: Մեզ արդեն ծանոթ պայմաններով օժտված մի երկիր նախ և առաջ պիտի ներկայացնե տեղական, առանձնակի շահերի հարստություն և ընդհանուր, համալեռնական շահերի աղքատություն: Երկիրը կուլտուրական շերտավորումների բազմազանություն է արտադրում: Խոր հովիտների ու կիրճերի մեջ բնությունը հարուստ է, թույլ է տալիս բարձր աստիճանի կուլտուրա: Ալդտեղ ազգաբնակչությունը նստակյաց է, ունի համախմբվելու, ուժեղ կազմակերպություն ստեղծելու հրամայողական կարիք: Բայց աչդպիսի տեղեր շատ չեն, ոչ էլ միապաղաղ երկար տարածություններ են կազմում, այլ կղզիացած, ցրված են, միմյանցից հեռու, անջատված լեռներով: Տիրապետողը, ընդարձակը, երկրին ընդհանուր գույն տվող լեռնային արոտների իրականությունն է, ուր կարող է զարգանալ հովվական թափառիկ, աստանդական կենցաղը: Իսկ հովվական կացությունը բոլորովին հակասում է հովիտների նստակեցության իդեալներին: Նա ճանաչում և պաշտում է միայն անձնական ազատություն, անջատ անհատական շահեր, նա արհամարհում է քաղաքական և վարչական սահմանները, որովհետև նրա հոտերին հարկավոր են ընդարձակ տարածություններ և նա իր շահերով կապված չէ մի որևէ հայտնի տեղի, հայտնի շրջանակի հետ: Այս է պատճառը, որ Հայաստանը չկարողացավ տեղական անջատ շահերի իրականությունից բաժնուհի մինչև ընդհանուր-համալեռնական, ընդհանուր-պետական շահերի մշտապես հասկացողությունը: Այսպիսի մի երկիր չի

¹ Այս բառի տակ Լեոն հասկանում է մակերևույթի կազմությունը — Ա. Ո.:

կառող ուժեղ, կենտրոնացած պետություն, կամ ավելի նիշտ ասած՝ բունապետություն ստեղծել»¹:

Միջանկյալ նշենք, որ, ընդհատելով իր խորհրդածությունները, Լեոն ալատեղ ծանոթագրության մեջ վկայակոչում է Լ. Մեչնիկովի «Քաղաքակրթությունը և պատմական մեծ դետերմինիզմը» աշխատությունը, — մի դիրք, որի հեղինակը, որպես հետևողական աշխարհագրական դետերմինիստ, ի միջի այլոց, պնդում էր, թե «Մեծ Բրիտանիայի պետական կառուցվածքը շատ տեսակետներից կարելի է համարել նրա կղզային դրության պարզ հետևանք»²: Սա մի չափազանց բնորոշ զուգադրություն է. եթե Գարագաշյանը, վկայակոչելով Ռիտտերին, րատ էություն ցույց էր տալիս իր և Ռիտտերի տեսակետների նույնականությունը, ապա Լեոն, վկայակոչելով Մեչնիկովին, պարզորոշ վկայում է, որ ինքը աշխարհագրական դետերմինիզմի համոզված կողմնակիցն է:

Այնուհետև Լեոն շարունակում է. «Անհամաչափությունը երկրի զանազան մասերի ազդաբնակության հոգեկան կարողությունների մեջ չափազանց մեծ էր, որպեսզի կարելի լիներ սպասել ընդհանուր, համայնական գործակցություն մի համագաղթին հարցի շուրջը: ...եվ շատ հասկանալի է, որ աշխարհագրական պայմաններով նպաստավորվող այսպիսի այլազանությունը, կուտուրական աստիճանների հակադրությունները ստեղծեցին ամբողջ երկրի համար բազմակերպված մի պետություն, որ ենթակվում էր ուրիշների տիրապետության և մանավանդ կուտուրական ազդեցության»³:

Լեոյի այս դատողություններից միանգամայն պարզ է դառնում նրա աշխարհագրական-դետերմինիստական կոնցեպցիան, որի էությունը հետևյալն է.

1) «Հայկական լեռնակղզու», այսինքն՝ ամբողջ պատմական Հայաստանի, ֆիզիկա-աշխարհագրական պայմանները այնպիսին են, որ «երկրին ընդհանուր դույն տվողը լեռնային արոտների իրականությունն է», ուր կարող է «զարգանալ միմիայն «հովվական թափառիկ կենցաղը», որը հակառակ է փոքրությամբ գետահովիտներում բնականորեն առաջացող նստակյաց բնակչության «համախմբվելու, ուժեղ կազմակերպություն ստեղծելու հրամայողական կարիքին»:

2) Այդ հանգամանքի, այսինքն՝ աշխարհագրական պայմանների շնորհիվ, Հայաստանը «նախ և առաջ պիտի ներկայացնե տեղական, առանձնակի շահերի հարստություն և ընդհանուր, համայնական շահերի ազդատություն», ինչ որ Լեոյի կարծիքով բնորոշ է եղել մեր երկրի ողջ հին պատմությանը:

3) Այդ նույն աշխարհագրական պայմաններն էին այն միակ հիմնական պատճառը, որի հետևանքով «Հայաստանը չկարողացավ տեղական անջատ շահերի իրականությունից բարձրանալ մինչև ընդհանուր-համայնական, ընդհանուր-պետական շահերի մշտատև հասկացողությունը»: Ահա թե որն է, քստ Լեոյի, միջնադարյան Հայաստանի ֆեոդալական մասնատվածության պատճառը...

4) Հայաստանի աշխարհագրական առանձնահատկությունների հետևանքով առանձնաշափությունը երկրի զանազան մասերի ազդարնակության հոգեկան

¹ Լ. Լ. Լ. Լ. Հայոց պատմություն, հատ. I, Թիֆլիս, 1917, էջ 166 — 167 (ընդգծումները մերն են — Ա. Ո.):

² Л. Мечников, Цивилизация и великие исторические реки, էջ 86:

³ Լ. Լ. Լ. Հայոց պատմություն, հատ. I, էջ 167 (ընդգծումները մերն են — Ա. Ո.):

կարողությունների մեջ չափազանց մեծ էր, որպեսզի կարելի լիներ սպասել ընդհանուր համայնական գործակցություն մի համազգային հարցի շուրջը»։ Ըստ Լեոյի, սա միջնադարյան Հայաստանի ֆեոդալական մասնատվածության, աղսպես ասած, հոգեբանական հիմքն էր, որի ենթահողը դարձյալ աշխարհագրական պայմաններն են համարվում։

5) Աշխարհագրական առանձնահատկություններից բխող այս բոլոր պայմանների շնորհիվ ստեղծվել էր «քաղաքականապես թույլ կազմակերպված մի պետություն, որ ենթարկվում էր ուրիշների (իմա՝ օտարերկրյա ագրեսորների—Ա. Ո.) տիրապետության և մանավանդ կուլտուրական ազդեցության»։

6) Ավելին. «այսպիսի մի երկիր չի կարող ուժեղ, կենտրոնացած պետություն ստեղծել», այսինքն, ըստ Լեոյի, դատապարտված է հավերժ մասնատվածության վիճակի։ Սա այլ բան չէ, քան եթե աշխարհագրական ֆատալիզմ, որը հատուկ է եղել աշխարհագրական դետերմինիզմի կողմնակիցներից շատ-շատերին։

Ահա ինչքան հեշտ էր «լուծում» Լեոն Հայաստանի ոչ միայն անցյալ պատմության իրթին հարցերը, այլև նրա ապագայի։

Աշխարհագրական դետերմինիզմով տոգորված այս կարգի մտքերի մենք հանդիպում ենք նաև Լեոյի ավելի ուշ շրջանի գործերում։ Այսպես, «Ճողջայական կապիտալում» հանգամանորեն նկարագրելով Ղարաբաղի բնական, տրնտեսական ու քաղաքական պայմանները, նա իր մտքերը ամփոփում է հետևյալ կերպ.

«Յուրաքանչյուր լեռնաստան, լինելով մի մեկուսացած աշխարհ, բնականորեն ենթադրել է տալիս մի համառ ու խոժոռ պահպանողականություն։ ...Հայաստանի մեջ տեղի ունեցած խոր, սասանեցուցիչ քաղաքական տակնուվրայություններն իրենց հուժկու ալիքներով զարնվել էին Ղարաբաղի լեռներին և չկարողանալով սրբել տանել լեռնային ամրակուռ կենցաղը, ինչպես արել էին համարյա ամեն տեղ, ստեղծել են այնպիսի նոր դրություն, որ լեռնջիւղությունն, իր սեփական ինքնատիպ հայանման համար, դիմում էր ձևափոխությունների և կարկատանների միջոցով դարձյալ պիտանի պահում հինը, ճիմնակա՞նք¹։ Իսկ այդ «հիմնականը» և «հինը» «համառ ու խոժոռ պահպանողականությունն է», որը, ըստ Լեոյի, աշխարհագրական միջավայրի բնական հետևանք էր։

Նույն գրքի մի այլ մասում, խոսելով Բարայել Օրու շրջանի մասին, Լեոն գրում է. «...լավագույն դեպքում լեռան (իմա՝ լեռնոտ երկրի — Ա. Ո.) պետական իդեալը գյուղական քաղաքականությունն էր, և այսպես էր և ուրիշ կերպ չէր կարող լինել, քանի որ լեռնային բնությունն իր ալֆատության² պատճառով, մանր գավառական անջատականության մեջ էր ամփոփում իր տնտեսական շահերը։ Այս ընդհանուր տնտեսական տկարությունը, միշտ սեղմված պահելով ազգաբնակչությունն աղքատության նեղլիկ շրջանակների մեջ, հնարավոր չի դարձնում նրա համար ոչ միայն լայն ու բնդարձակ ճեղքակարները, այլ նույնիսկ և մտածողական լայնախոհությունը՝ պետական և հասարակական կազմակերպության վերաբերմամբ»³։

¹ Լեո, Ոսկանյան կապիտալ, Երևան, 1934, էջ 134 (ընդգծումներն մերն են—Ա. Ո.)։

² Գրքում տպագրված է «իր աշխատությունն»։ Սա, անշուշտ, վրիպակ է—Ա. Ո.։

³ Լեո, Նույն տեղում, էջ 194 (ընդգծումներն մերն են—Ա. Ո.)։ Ըստ երևույթին «Ճողջայական կապիտալի» մեջ տեղ գտած նաև այս կարգի սխալներն են նկատի ունեցել Հայպետհրատի հրատարակիչները, երբ գրքի փոքրիկ առաջաբան-անոտացիայի հենց առա-

Ճիշտ նույնատիպ դատողությունների մենք հանդիպում ենք նաև «Հայոց պատմության» II հատորում, որտեղ, օրինակ, կարդում ենք. «Այս բոլոր լեռնոտ տարածությունները Կուր-Արաքսյան տափաստաններից մինչև Բարձր Հայքի արևմտյան սահմանները միանման են իրենց բնությամբ, ու ամեն տեղ գերազանցում են միատեսակ անտեսական երևույթի և հաստատել: Ամեն տեղ հնարավոր է միայն ալպիական մշակույթը, որ ստեղծում է միատեսակ տնտեսական ձևեր, ժողովրդական հոգեբանության միատեսակ տեղային պայմաններ¹: Քիչ հետո կեն գրում է. «Լեռնաստանի առանձնահատուկ պայմաններից մշակվում է շատ խիստ բնորոշ առանձնահատուկ տեղայնություն»²:

Հայ իրականության մեջ աշխարհագրական ղեկավարման ցայտուն ներկայացուցիչներից է նաև Խ. Սամվելյանը:

Իր «Հին Հայաստանի կուլտուրան» աշխատության I հատորի երկրորդ գլխում հանգամանալից ուսումնասիրության ենթարկելով Հայաստանի բնական պայմանները, նա հանդիմ է հետևյալ ընդհանրացնող եզրակացությանը. «Ամեն մի ժողովրդի կուլտուրայի զարգացումը պատկերացնելիս անհրաժեշտ է ի նկատի առնել այն բնական միջավայրը, որտեղ ընթացել է այդ ժողովրդի բովանդակ կյանքը: Բնական միջավայրն է պայմանավորում տվյալ ժողովրդի արտադրողական ուժերի բնույթն և զարգացումը, նրա տնտեսական գործունեության ամբողջ էությունը»³: Դժվար չէ հասկանալ, որ այս պարբերության առաջին կեսը բացարձակ ճշմարտություն է, մինչդեռ երկրորդ, մեր բնորոշ ծած մասը, շնայած իր «մարքսիստական» թվացող տերմինաբանության («արտադրողական ուժերի բնույթն և զարգացումը», «տնտեսական գործունեության էությունը»), աշխարհագրական ղեկավարման ցայտուն մի արտահայտությունն է:

Այդ նույն աշխատության մեջ ուսումնասիրելով այն հարցը, թե աշխարհագրական միջավայրի բաղկացուցիչ մասերից ո՞րն է նրա առավել վճռական էլեմենտը, Սամվելյանը գրում է. «Պատմության, և մասնավորապես կուլտուրայի պատմության, աշխարհագրական ներքնաշենքը (բազիսը) հանդիսանում են պատմական մեծ գետերը և նրանց այս կամ այն չափով կապող մեծ պատմական դաշտերը»⁴: Ով փոքրիշատե ծանոթ է Լ. Մենդիկովի՝ հիշատակված գրքին (որը լույս է տեսել հետմահու, 1889 թ.), անմիջապես կնկատի, թե ի՞նչ աստիճանի նույնական են այս երկու հեղինակների տեսակետները ինչպես «պատմության աշխարհագրական բազիսի», այնպես էլ «պատմական մեծ գետերի» վերաբերյալ:

Տին տողերում գրել են. «Պետական հրատարակչությունը հրատարակելով հանդուցյալ կետի ներկա աշխատությունը՝ նշում է, որ նրա մի շարք դրույթները ճիշտ չեն»:

¹ Լեռ, Հայոց պատմություն, հատ. II, Երևան, 1947, էջ 149 (ընդգծումը մերն է — Ա. Ո.):

² Նույն տեղում, էջ 150: «Հայոց պատմության» այս հատորի առաջարանում միանգամայն ճիշտ է նշված, որ «իդեալիստական մեթոդողիան, ուղեկցված ոչ քննադատական, ապրիորիստ «օբյեկտիվ», մեթոդով, հանդիսանում է ներկա հատորի առաջին հիմնական արատը», ինչպես նաև այն հանգամանքը, որ «Լեռն տուրք է ավել նաև աշխարհագրական ֆակտորի դերագնահատմանը» (Առաջարան, էջ VI—VII, XII):

³ Խաչիկ Սամվելյան, Հին Հայաստանի կուլտուրան. Պատմական ակնարկներ, հատ. I, Երևան, 1931, էջ 39:

⁴ Նույն տեղում, էջ 47:

Ինչպես տեսնում ենք, թե՛ Գարագաշյանի ու Պալասանյանի և թե՛ Լեոյի ու Սամվելյանի շատ տեսակետները իրենց վերջամբ միանգամայն համահունչն են Սոլովյովի, Կլյուչևսկու, Շչապովի և Մեչնիկովի տեսակետներին։ Սրանք, իհարկե, սլատահական դուգադիսություններ չեն, այլ ապացույցն են այն բանի, որ հիշյալ բոլոր հեղինակներն էլ սոցիոլոգիական նույն ուղղություն՝ աշխարհագրական դետերմինիզմի կողմնակիցներն են, որոնք սկզբունքորեն տարբեր տեսակետներ չեն արտահայտել։

Ինչո՞ւ բացատրել, որ իրենց հասուն տարիքի մի զգալի մասը սովետական ժամանակաշրջանում ապրած այնպիսի խոշոր գիտնականներ, ինչպիսիք էին Լեոն ու Ն. Սամվելյանը, տուրք են տվյալ աշխարհագրական դետերմինիզմի իդեալիստական, հակագիտական ուսմունքին։ Մեր կարծիքով, դա կարելի է բացատրել ոչ միայն բուրժուական անցյալից նրանց ժառանգությունն ստացած պատմագիտական կոնցեպցիաների բեռի ճնշմամբ և Պոկրովսկու վուկար-սոցիոլոգիական «շկոլայի» ազդեցությամբ, այլև այն հանգամանքով, որ ընդհուպ մինչև 30-ական թվականների վերջը մեզանում որոշ մտայնություն կար՝ հետևելով Գ. Վ. Պլեխանովի սխալ տեսակետին, հաշտեցման եզր որոնել ու գտնել սլատահական մատերիալիզմի և աշխարհագրական դետերմինիզմի միջև։ Հայտնի է, որ այդ տարիներին մեր գրականության մեջ նույնիսկ շրջանառություն ունեւր «աշխարհագրական մատերիալիզմ» հակագիտական տերմինը՝ որսւեա աշխարհագրական դետերմինիզմի հոմանիշ։



Աշխարհագրական դետերմինիզմի կողմնակիցների տեսակետների վերլուծությունից երևում է, որ այդ ուղղության բոլոր ներկայացուցիչներն ընդդրծում են աշխարհագրական միջավայրի կամ նրա առանձին էլեմենտների վրձնական, որոշիչ ուժը, որն անմիջականորեն արտահայտվում է մարդկանց հոգեբանության մեջ և սրա միջոցով, վերջին հաշվով, դառնում պատմական զարգացման հիմնական ու միակ շարժիչ ուժը։ Այսպիսով, հիմնականը համարվում է մարդկանց հոգեբանության միա աշխարհագրական միջավայրի կատարած ազդեցությունը, իսկ որպես հասարակական պրոգրեսի վճռական գործոն ներկայացվում է մարդկանց հոգեկան աշխարհը։ Ըստ էության այս ոչ այլ ինչ է, քան եթե հասարակության զարգացման իդեալիստական տեսության տարատեսակներից մեկը, տեսություն, որի հիմնական ելակետն այն պնդումն է, թե մարդկանց հասարակական կեցությունը որոշվում է նրանց գիտակցությամբ։ Այն հանգամանքը, որ աշխարհագրական դետերմինիզմի կողմնակիցների ուսմունքի համաձայն մարդկանց գիտակցությունը ձևավորվում է աշխարհագրական պայմանների որոշիչ ազդեցությամբ, ոչ մի էական բան չի փոխում հարցի դրվածքի մեջ, այլ լոկ ստեղծում է հակագիտական իդեալիստական և գոեհիկ մատերիալիստական ուսմունքների մի էկլեկտիկ խառնուրդ։

Աշխարհագրական դետերմինիզմի արատավորությունը դրսևորվում է նրանում, որ հասարակության կյանքի ու զարգացման հարցերը քննելիս նրա կողմնակիցները երևում են խիստ միակողմանի դիրքերից, հասարակության զարգացման պատճառները որոնում են ոչ թե բուն հասարակության մեջ, այլ, այդ զարգացման հիմնական շարժիչ ուժը համարելով աշխարհագրական միջավայրը, հասարակության զարգացման ներքին, իմանենտ օրենքները նեն-

դափովսում են արտաքին, աշխարհագրական պատճառներով, այսպիսով հասարակության զարգացման շարժիչ ուժերը հասարակությունից բնության մեջ տեղափոխելով:

Այս ուղղության կողմնակիցները պնդում են, որ աշխարհագրական միջավայրը վերջին հաշվով որոշում է և՛ հասարակության զարգացման աստիճանը, և՛ տարբեր հասարակական կառուցվածքների միջև եղած զանազանությունները, և՛ հասարակական կյանքի տարբեր ձևերի հաջորդական հերթափոխությունները, և՛ նույնիսկ հասարակության մեջ գոյություն ունեցող ազատության աստիճանը (Մոնտեսքյու): Այսպիսով նրանք անթույլատրելի չափերով ուռճացնում, գերազանցատում են հասարակության նյութական կյանքի պայմաններից մեկը և այն էլ ո՛չ վճռական ու որոշիչ պայմանը, աչքաթող են անում ու անուշադիր թողնում նյութական բարիքների հասարակական արտադրության եղանակի վճռական նշանակությունը: Այս էլ հենց նշանակում է հրաժարումն հասարակության պատմական զարգացման գիտական բացատրումից, անցում պատմության իդեալիստական ըմբռնման դիրքերը:

Աշխարհագրական գետերմիխիզմը (կամ՝ աշխարհագրական ուղղությունը սոցիոլոգիայում), ինչպես և հասարակական կյանքի մասին նախամաքսիստական բոլոր ուսմունքները, տալիս է հասարակական կյանքի և նրա զարգացման իդեալիստական բացատրությունը: Նախքան պատմության մատերիալիստական ըմբռնման հալածողորժումը Սարքսի կողմից, սոցիոլոգիական բոլոր տեսությունների հիմնական արատներից մեկն այն էր, որ, ինչպես նշում է Լենինը, այդ տեսությունները «լավագույն դեպքում քննում էին մարդկանց պատմական գործունեության լոկ իդեալական մոտիվները, չհետազոտելով այն, թե ինչից են առաջանում այդ մոտիվները, չըմբռնելով հասարակական հարաբերությունների սիստեմի զարգացման օբյեկտիվ օրինաչափությունը, չտեսնելով այդ հարաբերությունների արձատները նյութական արտադրության զարգացման աստիճանի մեջ»¹: Այդ տեսությունները դրնում էին, որ պատմական զարգացումը վերջին հաշվով հանդիսանում է մարդկանց իդեալների կամ տեսակետների, կարծիքների փոփոխման, զարգացման արդյունք: Իսկ այն դեպքերում, երբ նրանք այդ փոփոխման ու զարգացման պատճառները բացատրելու համար դիմում էին աշխարհագրական միջավայրի ազդեցությանը, ապա բացարձակացնում էին այդ և աշխարհագրական միջավայրի վճռական ներգործության հետևանք էին համարում և՛ հասարակական կյանքը, և՛ դրա զարգացումը, և՛ հասարակական ֆորմացիաների հերթափոխությունը, և՛ քաղաքակրթության զարգացման աստիճանը:

Աշխարհագրական գետերմիխիզմի էությունը բնութագրելու համար լիովին պահպանում են իրենց ուժը Լենինի խոսքերն այն մասին, թե՛ «դիալեկտիկական մատերիալիզմի տեսակետից... փիլիսոփայական իդեալիզմն իմացության դժվարներից, կողմերից, երեսակներից մեկի միակողմանի, չափազանցված... զարգացումն է (փքացումը, ուռեցումը) մինչ արսուլյուտը»²: Աշխարհագրական գետերմիխիզմի ներկայացուցիչների մոտ այդպիսի միակողմանիորեն չափազանցված, կտրված ու արսուլյուտի աստիճանը բարձրացված գործոնի զերում հանդես է գալիս աշխարհագրական միջավայրը:

¹ Վ. Ի. Լենին, Երկեր, հատ. 21, էջ 57:

² Վ. Ի. Լենին, Մատերիալիզմ և էմպիրիոկրիտիցիզմ, Երևան, 1933, էջ 423:

Աշխարհագրական դետերմինիզմի արատներից է նաև նրա մետաֆիզիկական ու ոչ պատմական էությունը: Ելնելով աշխարհագրական միջավայրի պայմաններից և դրանց հիման վրա կառուցելով պատմական զարգացման իրենց հակադիտական կոնցեպցիան (որը առաջին հայացքից թվում է «օբյեկտիվ», քանի որ իբրև ելակետ ընդունվում է ոչ թե աստված, բացարձակ իդեան կամ ամեն ինչից անկախ մարդկային կամքը, այլ ինչ-որ նյութական բան՝ աշխարհագրական պայմանները), այդ ուղղության ներկայացուցիչները բուն իսկ աշխարհագրական միջավայրը, հասարակության զարգացման վրա նրա ազդեցության աստիճանը դիտում են որպես մեկ անգամ ընդմիշտ տրված մի բան, որը անփոփոխ է մնում բոլոր ժամանակներում և պատմական բոլոր էպոխաներում: Հավագույն դեպքում նրանք քննարկում են միայն գոյություն ունեցողը, և ոչ թե զարգացողը, հասարակության կյանքը պատկերացնելով որպես ինչ-որ քարացած յան: Պատմական երևույթների քննարկման հենց այս կարգի արատավոր տեսությունները նկատի ունեն Սարքսը, երբ իր նամակներից մեկում գրում էր. «Իրար զարմանալիորեն նման, սակայն պատմական տարբեր միջավայրում տեղի ունեցող անցքերը հասցնում են միանգամայն տարբեր արդյունքների: Այդ էվոլյուցիաներից ամեն մեկն առանձին ուսումնասիրելուց և ապա միմյանց համագրելուց հետո, հեշտ է գտնել այդ երևույթն ըմբռնելու բանալին. բայց երբեք էլ չի կարելի հասնել այդ ըմբռնմանը, օգտագործելով պատմա-փիլիսոփայական որևէ ընդհանուր տեսության ունիվերսալ ազդվուկը (որը միանգամից բացատրում է ամեն ինչ, որովհետև ոչինչ չի բացատրում), որի մեծագույն արժանիքը իր վերապատմականությունն է»¹:

Աշխարհագրական դետերմինիզմի երրորդ էական արատը նրա հայեցողական բնույթն է: Սոցիոլոգիական այս ուղղության համարյա բոլոր ներկայացուցիչների մոտ բացակայում է հասարակության կողմից բնության վրա կատարվող ներգործուն ազդեցության, ակտիվության մոմենտը, մի բան, որ վերջին հաշվով հանգեցնում է ֆատալիզմի:

Հասարակության պատմական զարգացումը բացառապես կամ գլխավորապես աշխարհագրական գործոններից ելնելով բացատրելը նույնքան սխալ է և հակադիտական, ինչքան որ այդ զարգացման հիմքերը սուբյեկտիվ գործոնների՝ մարդկանց (աչքի ընկնող անհատների, թագավորների, զորավարների...) գիտակցության և կամքի մեջ որոնելը: Թե՛ մեկը, թե՛ մյուսը հանդիսանում են պատմական զարգացման պրոցեսի միևնույն իդեալիստական, հակադիտական բացատրության տարատեսակները:

Վերը մենք տեսանք, որ հասարակության զարգացման միակ դիտական տեսության՝ մարքսիզմ-լենինիզմի տեսակետից աշխարհագրական դետերմինիզմը պատմական զարգացման դիտական տեսություն չէ, որովհետև հակասում է հասարակության զարգացման իրական ընթացքին և ամենեին չի բացատրում այդ զարգացումը: Չնայած դրան, սոցիոլոգիական այդ ուղղության նշանակությունը նրա գոյության բոլոր ժամանակաշրջաններում նույնը չի եղել: Ինչպես արդեն ասվել է, նրա առաջին տեսաբանները (մասնավորապես Մոստեսքոն) իրենց ուսմունքը հակադրում էին այն ժամանակ ամենակարող քրիստոնեական կրոնի թեոլոգիական կոնցեպցիաներին, և հենց այդ չափով էլ աշխարհագրական դետերմինիզմը օբյեկտիվորեն դրական դեր էր

¹ К. Маркс и Ф. Энгельс, Сочинения, изд. I, т. XV, էջ 378:

խաղում: Հիշյալ դարաշրջանի իդեալիստական քառսի պայմաններում, երբ անբաժան կերպով իշխում էին միջնադարյան թեոլոգիան ու խավարամոլությունը, հասարակության նյութական կյանքի պայմաններից մեկը հանդիսացող աշխարհագրական միջավայրի նշանակության վրա հենվելը ըստ ինքյան արդեն պրոգրեսիվ երևույթ էր, հանդիսանալով մի քայլ՝ հասարակական զարգացման նյութական պայմանները աստվածային նախախնամությունից դուրս, արտաքին աշխարհում որոնելու ուղղությամբ:

Հայ մեծ ունյուցիոն-գեմոկրատ Միքայել Նալբանդյանը միանգամայն արդարացիորեն նկատել է աշխարհագրական գետերմիտիզմի զարգացման սկզբնական շրջանի հենց այս պրոգրեսիվ կողմը: Պետրոպոլիտիկայի բերդում ծանոթանալով Բոքլի գրքին, Նալբանդյանը (որին միանգամայն խորթ էին Բոքլի ընդհանուր սոցիոլոգիական տեսակետները) բարձր գնահատական է տալիս աչդ գրքին հենց այն պատճառով, որ դրա հեղինակը որոնում էր հասարակության զարգացման բնական, և ոչ թե աստվածային զրգապատճառներն ու հիմքերը: Բոքլին ձոնված ուսանավորում («Հենրիկոս Թովմաս Բոքլի հիշատակին») նա գրում էր.

Բնությունից, անցած կյանքից
Հանում է ճիշտ օրենքներ
Եվ փրկում է դիպվածներից
Մարդկության կյանքի գործեր:

...
Նա կապում է պատմությունը
Բնության հետ պինդ կապով,
Ցանցառ միստիկի բաժնածր՝
Մարմին, ողի, մի օղով:
«Ոգին մարմնին է համեմատ,
Արդյունք բնության է մարմին»:
Բնության դարձավ հողին հնազանդ,
Հողս միստիկի դյուին¹:

Իր հետագա զարգացման ընթացքում աշխարհագրական գետերմիտիզմը վերածվեց գաղութային թաղանթ քողարկելու հարմար միջոցի, իսկ խմբերիտիզմի էպոխայում դարձավ մի ռեակցիոն ուսմունք, որի նպատակն է մի կողմից պայքարել հասարակական զարգացման իսկական գիտական տեսության՝ պատմական մատերիալիզմի դեմ, իսկ մյուս կողմից՝ «տեսականորեն» հիմնավորել իմպերիալիստական էքսպանսիան²:

* * *

Աշխարհագրական գետերմիտիզմի լիակատար սնանկությունը, նրա իդեալիստական, մետաֆիզիկական ու հայեցողական էությունն ու էքսպանսիոնիստական նպատակասլացությունը մերկացվեցին հասարակական զարգաց-

¹ Մ. Նալբանդյան, Երկերի լիակատար ժողովածու, հատ. I, Երևան, 1945, էջ 105,

² Աշխարհագրական գետերմիտիզմի էվոլյուցիայի մասին (ընդհուպ մինչև գերմանա-ֆաշիստական գեոպոլիտիկան և ժամանակակից ամերիկյան գեոստրատեգիան) հանգամանորեն խոսվում է մեր «О роли географической среды в развитии общества» աշխատության մեջ (Հայկական ՄՍՄ ԳԱ Հրատարակչություն, Երևան, 1956):

ման մարքս-լենինյան դիալեկտիկա-մատերիալիստական ուսմունքի կողմից: Մարքսիզմ-լենինիզմը ցույց տվեց, որ աշխարհագրական դետերմինիզմը ոչ մի ընդհանուր բան չունի պատմական մատերիալիզմի հետ և հանդիսանում է պատմության իդեալիստական ըմբռնման լուրջ մի տարատեսակը:

Միմիայն պատմական մատերիալիզմի առաջացումից հետո սոցիոլոգիան դարձավ գիտություն: Պատմական մատերիալիզմը տեսականորեն պատկազերթ արեց հասարակական կյանքի իդեալիստական ըմբռնումը, որի համաձայն պատմության շարժիչ ուժը հանդիսանում են մարդկանց իդեաները, գիտակցությունը, կամքը: Մարքսն ու էնգելսը ցույց տվեցին, որ ո՛չ թե հասարակական գիտակցությունն է պայմանավորում հասարակական կեցությունը, այլ, ընդհակառակը, մարդկանց հասարակական կեցությունն է որոշում նրանց հասարակական գիտակցությունը:

Մարքսիզմ-լենինիզմի կրասիկները ապացուցեցին, որ նյութական բարիքների արտադրության եղանակը (որ իրենից ներկայացնում է հասարակության արտադրողական ուժերի և նյութական բարիքների արտադրության պրոցեսում մարդկանց միջև ստեղծվող արտադրական հարաբերությունների միասնության մարմնավորումը) հանդիսանում է այն հիմքը, որի վրա բարձրանում են մարդկանց բոլոր մյուս հարաբերությունները, և ցույց տվեցին, որ հասարակության ողջ զարգացումը վերջին հաշվով որոշվում է արտադրության եղանակով:

Եթե արտադրության եղանակը հանդիսանում է հասարակության նյութական կյանքի պայմանների սիստեմում այն գլխավոր ուժը, որը վերջին հաշվով որոշում է հասարակության բնույթը և որի փոփոխման շնորհիվ համապատասխան փոփոխություններ են կատարվում հասարակական կյանքի բոլոր ոլորտներում, — եթե արտադրության եղանակը հանդիսանում է հասարակության նյութական կյանքի պայմանների վճռական գործոնը, ապա դա, իհարկե, չի նշանակում, թե ժխտվում է այդ պայմանների մասը կազմող մյուս երկու էլեմենտների՝ աշխարհագրական միջավայրի և ազդաբնակության աճի ակտիվ դերը հասարակության զարգացման մեջ:

Մասնավորապես, հասարակության զարգացման մեջ աշխարհագրական միջավայրի դերի պարզաբանումը տեսական մեծ նշանակություն ունի, քանի որ դա հնարավորություն է տալիս գիտականորեն ճիշտ վերլուծել և ըմբռնել հասարակության զարգացման օբյեկտիվ օրենքները: Առանց ուսումնասիրելու այն հարցը, թե ինչպիսի՞ փոխհարաբերություններ ու փոխազդեցություններ գոյություն ունեն հասարակության և աշխարհագրական միջավայրի միջև, անհնար է ճիշտ հասկանալ հասարակության նյութական կյանքի զարգացումն ու դրա օրինաչափությունները, անհնար է ըմբռնել այն բազմաթիվ պրոցեսների էությունը, որոնք կատարվում են աշխարհագրական միջավայրում մարդկանց գործունեության հետևանքով, ինչպես նաև բացահայտել աշխարհագրական միջավայրի դերը հասարակության կյանքում:

Ամեն մի հասարակության գոյության հիմքը աշխատանքն է, որի արտադրողականությունը որոշակիորեն կապված է աշխարհագրական միջավայրի պայմանների հետ: Այդ կապը հատկապես ուժեղ ու անմիջական է եղել հասարակության զարգացման ավելի վաղ դարաշրջաններում: Աշխարհագրական միջավայրի վրա հասարակության ազդեցության աստիճանը միշտ կախված է արտադրողական ուժերի զարգացման աստիճանից և հասարակական ձևից:

Մյուս կողմից, աշխարհագրական միջավայրի նշանակությունը արտադրողական ուժերի, մասնավորապես արտադրության գործիքների, տեխնիկայի զարգացման համար այն է, որ աշխարհագրական միջավայրն է տալիս և՛ արտադրության գործիքների ստեղծման համար անհրաժեշտ նյութերը (փայտը, քուրը, մետաղները և այլն), և՛ այն ուժերը, որ գործողության մեջ են դնում այդ գործիքները (ջուրը, քամին, շոգին, էլեկտրականությունը, միջուկային էներգիան), և՛ այն նյութերը, որոնցից մարդիկ արտադրության գործիքների միջոցով արտադրում են իրենց կյանքի համար անհրաժեշտ բոլոր նյութական բարիքները (սնունդ, հագուստ, բնակարան և այլն)։

Հասարակության նյութական կյանքի զարգացման վրա աշխարհագրական միջավայրի ազդեցությունը կարող է արտահայտվել և արտահայտվում է ոչ թե անմիջականորեն, այլ միայն արտադրողական ուժերի միջոցով¹։ Բայց թեև աշխարհագրական միջավայրը ազդում է արտադրողական ուժերի, առաջին հերթին՝ արտադրության գործիքների, տեխնիկայի զարգացման վրա, օժանդակելով կամ, ընդհակառակը, դժվարացնելով այն, — այնուամենայնիվ նրա ազդեցությամբ չի որոշվում այդ զարգացումը, քանի որ վերջինս կախված է նախ և առաջ հասարակական արտադրության ձևից, նրա պահանջներից, որոնք պայմանավորված են ոչ թե աշխարհագրական, այլ հասարակական գործոններով։

Միմիայն հասարակական արտադրության կարիքներն են, որ առաջ են բերում ու խթանում արտադրողական ուժերի փոփոխություններն ու կատարելագործումը։ Այսպես, վերջին հաշվով փոխանակության պրոցեսը արագացնելու հասարակական պահանջն ու անհրաժեշտությունն էր, որ կյանքի կոչեց շոգեքարշն ու շողենավը, ջերմաքարշն ու էլեկտրաքարշը, ավտոմոբիլն ու օդանավը։ Հասարակության տարբեր մասերի միջև անհրաժեշտ կապերի արագացման հասարակական պահանջի հետևանքով երևան եկան հեռախոսն ու հեռադիրը, ռադիոն և հեռուստատեսությունը։ Աշխատանքի արտադրողականության բարձրացման հասարակական անհրաժեշտության հետևանք են արտադրական բաղմամբի կարևոր պրոցեսների և ամբողջ արտադրական ճյուղերի ավտոմատացումն ու տեղեկատվականիզացիան և մեր դարաշրջանի այնպիսի մի հրաշալիքը, ինչպիսին է էլեկտրոնային հաշվիչ մեքենան։ Կարճ ասած, մեր ժամանակակից ողջ տեխնիկան՝ իր մեքենայական հսկա զինվածությամբ, հզոր էներգետիկ տնտեսությամբ, տրանսպորտի և կապի լայնածավալ միջոցներով, հանդիսանում է նյութական բարիքների արտադրության ասպարեզում հասարակության օրրոտօրե աճող պահանջմունքների հետևանքը։

Այս ամենը մեզ հետաքրքրող հարցի՝ հասարակության և աշխարհագրական միջավայրի փոխհարաբերության պրոբլեմի միայն մեկ կողմն է։ Երբեք չի կարելի մոռանալ այդ հարցի մյուս, ոչ սակավ կարևոր ու էական կողմը, — այն, որ արտադրական հարաբերությունների զարգացմանը զուգընթաց, արտադրողական ուժերի կատարելագործման և աճի, տեխնիկայի առաջադիմությամբ հետ մեկտեղ մեծանում են աշխարհագրական միջավայրի վրա մար-

¹ Այստեղ մենք դանդ ենք առնում աշխարհագրական միջավայրի առանձին էլեմենտների կամ կողմերի անմիջական ազդեցությունը մարդկանց հոգեկան աշխարհի վրա, որովհետև նախ՝ դա մեծ նշանակություն չունի նյութական արտադրության զարգացման համար և ապա՝ ոչառնական զարգացման ընթացքում, արտադրողական ուժերի կատարելագործման պրոցեսում, արագորեն թուլանում է։

դու ազդեցության մասշտաբները, արագանում է մարդկային աշխատանքի շնորհիվ աշխարհագրական միջավայրի վերափոխման տեմպը, բարձրանում է քննության վրա մարդկանց ազդեցության աստիճանը: Այլ կերպ ասած, հասարակության ազդեցության տակ ինքը՝ աշխարհագրական միջավայրը փոխում է իր կերպարանքը: Աշխարհագրական դիտությանը հաշտնի են հազարավոր չիաստեր այն մասին, թե ինչպես դարերի ընթացքում, մարդկային աշխատանքի շնորհիվ, մինչև անձանաչելիության աստիճան փոխվել է ընդարձակ տերիտորիաների և նույնիսկ ամբողջ երկրների ու աշխարհամասերի լանդշաֆտը, նրանց նախկին «բնական տեսքը»:

Այստեղ անհրաժեշտ է նշել, որ ինչպես աշխարհագրական միջավայրի վրա հասարակության ազդեցության աստիճանը, այնպես էլ այդ միջավայրի դերը հասարակության զարգացման գործում միևնույնը չեն եղել ողջ պատմության ընթացքում: Դրանք փոփոխվել են այն չափով, ինչ չափով փոփոխվել ու զարգացել են արտադրողական ուժերն ու նրանց համապատասխանող արտադրական հարաբերությունները: Ըստ որում ինչքան ավելի զանդաղ էին զարգանում արտադրողական ուժերը, ինչքան քիչ էր մարդկանց կուտակած արտադրական փորձը, ինչքան անզարգացած էր արտադրության եղանակը, այնքան ավելի երկարատև էր այն ժամանակամիջոցը, որի ընթացքում հեղ էր նախապատրաստվում արտադրողական ուժերի մեծ փոփոխությունների համար և, հետևապես, հասարակության ու աշխարհագրական միջավայրի փոխհարաբերությունների միջև խոշոր տեղաշարժերի համար: Այսպես, օրինակ՝ մինչև որ մարդը քարե կացնից ու մահակից հասավ կրակի, շատ ավելի ուշ՝ նաև շոգու օգտագործմանը, անցան տասնյակ ու հարյուր հազարավոր տարիներ, մինչդեռ շոգու և էլեկտրականության դարաշրջանների միջև ընկած է ընդամենը երկու հարյուրամյակ, իսկ էլեկտրականության և միջուկային էներգիայի հայտնաբերման ու օգտագործման դարաշրջանների միջև՝ հարյուր տարուց էլ պակաս:

Պատմականորեն որոշակի ամեն մի արտադրանդանակ որոշում է և՛ աշխարհագրական միջավայրի ազդեցության աստիճանը, նրա նշանակությունը հասարակության զարգացման համար, և՛ այդ միջավայրի վրա հասարակության ազդեցության, գերիշխանության աստիճանը, այսինքն՝ աշխարհագրական միջավայրը վերափոխելու և օգտագործելու ունակ հնարավորության աստիճանը: Այլ կերպ ասած, հասարակության զարգացման մեջ աշխարհագրական միջավայրի դերն ու նշանակությունը կախված են արտադրողական ուժերի զարգացման մակարդակից և այդ ուժերին համապատասխանող արտադրական հարաբերությունների բնույթից և իրենցից չեն ներկայացնում մեկ անգամ ընդմիշտ տրված ու անփոփոխ մեծություններ:

Այսպիսով, մեզ հետաքրքրող հարցին պատմական մոտեցումը ցույց է տալիս, որ աշխարհագրական միջավայրի դերն ու ազդեցությունը հասարակության զարգացման վրա կախված են նյութական արտադրության զարգացման մակարդակից և միևնույնը չեն հասարակության արտադրողական ուժերի զարգացման տարբեր աստիճանների ժամանակ: Հասարակության զարգացման տարբեր էտապներում աշխարհագրական միջավայրի դերը տարբեր է, և ոչ թե միատեսակ: Մի կողմից՝ աշխարհագրական միջավայրի վրա մարդու (հասարակության) ազդեցության բնույթը, ձևերը, ուժը և աստիճանը, իսկ մյուս կողմից՝ այդ միջավայրի ազդեցությունը հասարակության զարգացման վրա

պատմական տարբեր էպոխաներում տարբեր են եղել: Մարդկային հասարակության զարգացման ողջ պատմական պրոցեսի ուսումնասիրությունը անխուսափելիորեն բերում է այն միակ ճիշտ, գիտական օրինաչափության հայտնաբերմանը, որ ինչքան ավելի խորն ենք գնում դեպի հին ժամանակաշրջանները, այսինքն՝ ինչքան ցածր է ու պրիմիտիվ հասարակական արտագրությունը, այնքան մարդը ավելի է կախված շրջապատող աշխարհագրական միջավայրից, այնքան ավելի ուժեղ է աշխարհագրական միջավայրի անմիջական ազդեցությունը հասարակության վրա և, ըստ այդմ էլ, թույլ է ու աննշան այդ միջավայրի օգտագործումն ու ենթարկումը մարդու կողմից: Ընդհակառակը, ինչքան բարձր է հասարակական արտագրության մակարդակը, ինչքան ավելի կատարյալ է արտագրանդանակը, ինչքան զարգացած են հասարակության արտագրական ուժերը, ինչքան զարգացած է տեխնիկան, այնքան ավելի թույլ է հասարակության անմիջական կախումը աշխարհագրական միջավայրի ազդեցությունից և, ըստ այդմ էլ, բարձր է հասարակության կողմից աշխարհագրական միջավայրի օգտագործման, վերափոխման ու ենթարկման մակարդակը:

Արտագրության զարգացման ավելի բարձր աստիճաններում հասարակության կապերը աշխարհագրական միջավայրի հետ դառնում են ավելի ու ավելի բարդ, բազմակողմանի, բազմատեսակ ու նրբին, թեպետ և հասարակությունը անմիջականորեն ավելի փիչ է կախված աշխարհագրական միջավայրի պայմաններից: Հասարակության զարգացման ընթացքում, մի կողմից, մարդկությունը աստիճանաբար ազատագրվում է բնության կուլուր ուժերի գերիշխանությունից, իսկ մյուս կողմից՝ ավելի ու ավելի մեծանում է աշխարհագրական միջավայրի օգտագործումը մարդու կողմից: Հենց այս վերջին առումով էլ՝ մեծանում է աշխարհագրական միջավայրի նշանակությունը հասարակության համար:

Այսպիսին է հասարակության և աշխարհագրական միջավայրի փոխհարաբերության դիալեկտիկան: Հասարակության զարգացման պրոցեսում նրա անմիջական կախումը աշխարհագրական միջավայրից գնում է վարրեթաց գծով (այսինքն՝ մարդը աստիճանաբար դառնում է բնության տերը), մինչդեռ աշխարհագրական միջավայրի վերափոխումը, օգտագործումը, ենթարկումը հասարակության կողմից զարգանում է վերրեթաց գծով: Եթե նախնադարյան համայնական կարգերում մարդը մաքսիմալ չափերով կախված է եղել աշխարհագրական միջավայրից և մինիմալ չափերով է օգտագործել նրա ուժերն ու առարկաները, ապա ապագա կոմունիստական հասարակարգում գոյություն կունենա միանգամայն հակադիր փոխհարաբերություն, այն է՝ հասարակության մինիմալ անմիջական կախում աշխարհագրական միջավայրից և նրա ուժերի ու առարկաների մաքսիմալ օգտագործում, վերափոխում ու ենթարկում:

ГЕОГРАФИЧЕСКИЙ ДЕТЕРМИНИЗМ В АРМЯНСКОЙ ИСТОРИОГРАФИИ

А. М. ВОСКАНЯН

(Р е з ю м е)

В статье дается краткий очерк исторической эволюции географического детерминизма, с позиций марксизма-ленинизма анализируется это идеалистическое направление в буржуазной социологии и показывается, что в период своего наибольшего распространения, во второй половине XIX и начале XX вв., оно имело своих приверженцев также среди армянских ученых. На основании анализа ряда работ наиболее выдающихся армянских географистов (историков А. Гарагашяна, Ст. Паласаняна, Лео и Х. Самвеляна) показывается идентичность их взглядов на роль географической среды в жизни и развитии общества основным мыслям крупнейших русских (С. Соловьев, А. Щапов, В. Ключевский, Л. Мечников) и западноевропейских (Монтескье, Риттер) представителей этого направления в социологии. Показывается также, что упомянутые армянские сторонники географического детерминизма, как и названные выше русские ученые, не делали из своего учения никаких расистских и экспансионистских выводов, которые были свойственны ряду западноевропейских географов XIX—XX вв. (Бокль, Ратцель, немецкие и американо-английские геополитики). В конце статьи кратко излагается марксистское учение о роли географической среды в общественном развитии.